



Broj/Број: 01/2a-50-1-2-34/08
Sarajevo/Сарајево, 11.11.2008.godine

ZAPISNIK

34. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 04.11. 2008.

Sjednica Komisije je počela u 11.00 sati. Sjednici su prisustvovali članovi Komisije: Slavko Matić, Azra Hadžiahmetović, Milorad Živković, Milica Marković, Husein Nanić, Azra Alajbegović, Sadik Ahmetović i Sefer Halilović.
Sjednici nije prisustvovao Denis Bećirović.

Osim članova Komisije sjednici su prisustvovali i Elma Bačvić i Rabija Mašić ispred Ministarstva vanjskih poslova BiH.

Zapisnik su vodili Merdžana Iglica sekretar Komisije, i Miroslav Stanišić stručni saradnik u Komisiji za vanjske poslove.

Predsjedavajući Slavko Matić je na početku konstatujući da postoji kvorum pozdravio članove Komisije i predstavnike Ministarstva vanjskih poslova BiH. On je kazao da sa njegove strane nema prijedloga za izmjenu i dopunu dnevnog reda i otvorio raspravu o istom.

Azra Hadžiahmetović je predložila da se odgodi rasprava o drugoj tački dnevnog reda uz obrazloženje da nema ni inicijatora ove tačke dnevnog reda a i zbog odsustva Harisa Silajdžića zbog službenog puta. Naglasila je da je dr. Silajdžić spreman i da stoji na raspolaganju članovima Parlamenta u raspravi o inicijativi Branka Dokića te da bi bilo korisno raspravljati o ovoj tački uz prisustvo Harisa Silajdžića.

Milica Marković je kazala da je do sad bilo neuobičajeno da se skidaju tačke dnevnog reda koje su predviđene za dnevni red, i da je ova tačka predviđena za dnevni red sjednice Predstavničkog doma. Ona je kazala da ako se tačka skine sa dnevnog reda to ne znači da ona neće biti razmatrana na sjednici Predstavničkog doma i obrnuto ako bude razmatrana na sjednici komisije ne znači da neće biti skinuta sa dnevnog reda Predstavničkog doma. Ona je kazala da ako se Komisija pridržava nekih principa u svom načinu rada, da je onda uobičajeno da se držimo predloženog dnevnog reda naročito u

pogledu tačaka koje su predložene za dnevni red sjednice Predstavničkog doma, a da kad se dođe do ove tačke mogu se zauzeti različita stajališta u pogledu ove inicijative.

Azra Alajbegović je kazala da je upravo odgađanje rasprave o ovoj tački zbog neprisustva inicijatora ove tačke i Harisa Silajdžića kontinuitet principijelnog rada Komisije jer je Komisija do sad za svaku tačku dnevnog reda imala predlagače i ako nismo imali nekoga ko će na neki način obrazložiti tu tačku ili dokument o kojem se raspravlja ona bi bila skidana sa dnevnog reda i bila razmatrana na nekoj sljedećoj sjednici.

Milica Marković je kazala da se može složiti sa Azrom Alajbegović samo u dijelu da treba da budemo principijelni, ali da smo ranije bili principijelni tako da nismo skidali tačke sa dnevnog reda nego kad bi došli do određene tačke dnevnog reda Komisija bi konstatovala da nemamo predlagača i da Komisija ne može da se izjasni o pojedinim Sporazumima ili nekoj drugoj materiji koja je razmatrana. Ona je kazala da ostajemo principijelni ako ispoštujemo dnevni red, a da kada dodjemo do određene tačke dnevnog reda možemo zauzeti različit stav ili konstatovati da nemamo predlagača i da Komisija nije mogla razmatrati tu tačku.

Slavko Matić je postavio pitanje sekretaru Komisije da li je Komisija pozvala inicijatora ove tačke i eventualno Harisa Silajdžića ili nekoga iz njegovog ureda.

Merdžana Iglica je odgovorila da je poziv upućen Predsjedništvu BiH ali ne i inicijatoru ove tačke Branku Dokiću.

Husein Nanić je kazao da s obzirom da Komisija nije uputila zvaničan poziv inicijatoru ove tačke, nije dobro da Komisija ulazi u rasprave bez prethodnih jasnih stavova i u tom smislu i zbog digniteta članova Komisije bi bilo dobro da se ova tačka skine sa dnevnog reda. On je zamolio za jasno tumačenje, ili sekretara ili članove komisije, u kom smislu Komisija može zauzimati stav po ovom pitanju i da li je Komisija zaista nadležna da ocijenjuje govore članova Predsjedništva bilo gdje da se pojave. On je kazao da bi ova tačka otvorila jednu raspravu koja ne bi dala dobar i kvalitetan rezultat ni samoj Komisiji, i zbog činjenice da nemamo prisutnog predlagača se pridružio zahtjevu Azre Hadžiahmetović da se ova tačka skine sa dnevnog reda.

Slavko Matić je formalno kazao da se samo raspravlja o dnevnom redu po kom će se danas raditi isto kao što će se sutra raspravljati na sjednici Predstavničkog doma, da će Kolegij Predstavničkog doma biti nakon sjednice Komisije za vanjske poslove. On je kazao da Kolegij već prije sjednice skine neke tačke dnevnog reda ako nisu prošle proceduru odbora i komisija, što ne implicira ono što će komisija sada odlučiti.

Azra Hadžiahmetović je kazala da će ona i na sjednici Predstavničkog doma pokrenuti inicijativu da se rasprava o ovoj tački odgodi zbog neprisustvovanja Harisa Silajdžića koji nije u mogućnosti da prisustvuje sjednici zbog ranije preuzetih obaveza.

Milorad Živković je podsjetio, da u članu 42. Poslovnika piše da Komisija prati vođenje spoljne politike Predsjedništva BiH i Savjeta Ministara BiH i da možda ova odredba Poslovnika ima koliziju sa ustavom. On je naveo da je Komisija željela da dobije ovu funkciju i da ne vidi ni jedan razlog zbog čega bi se sad odrekli te naše želje zbog ovog konkretnog slučaja. S druge strane kazao je da se tačka ne može staviti na dnevni red sjednice Predstavničkog doma ako ne postoji bilo kakvo mišljenje komisije. Treća stvar kazao je, u slučaju da dobijemo mišljenje Komisije i za koje misli da ga možemo dobiti na sjednici bilo ono pozitivno ili negativno, na sjednici Predstavničkog doma se ne raspravlja o govoru Harisa Silajdžića već samo o inicijativi Branka Dokića da se to stavi na dnevni

red neke od narednih sjednica Predstavničkog doma, kao što se raspravljalo i o inicijativi Adema Huskića da se raspravlja o državnoj imovini na nekoj od narednih sjednica, što je i prihvaćeno na sjednici Predstavničkog doma.

Azra Hadžiahmetović je kazala da je ona mislila da će se ulaziti u samu raspravu o govoru Harisa Silajdžića i da nije korektno raspravljati ako nemamo inicijatora i osobu o kojoj je konkretno riječ. Ona je kazala da cijeni obrazloženje Milorada Živkovića i da je dobro da se komisija generalno ne odriče mogućnosti koje ima i da treba podržati inicijativu da se na jednoj od narednih sjednica raspravi o bilo kom pitanju, a koje se tiče rada Predsjedništva BiH u domenu vanjske politike uz prisustvo Harisa Silajdžića.

Slavko Matić je nakon toga stavio na glasanje predviđeni dnevni red sa tačkom dva o inicijativi Branka Dokića u formi kako je obrazložio Milorad Živković.

Članovi Komisije su jednoglasno usvojili sljedeći

DNEVNI RED

1. Usvajanje zapisnika sa 33. sjednice Povjerenstva;
2. Razmatranje inicijative zastupnika Branka Dokića s 36. sjednice Doma u vezi sa izlaganjem predsjedatelja Predsjedništva BiH Harisa Silajdžića prilikom obraćanja u Generalnoj skupštini UN-a i u Parlamentarnoj skupštini Vijeća Europe;
3. Upoznavanje članova Povjerenstva sa terminom posjeta Republici Hrvatskoj;
4. Upoznavanje sa izvješćima i informacijama pristiglim na Povjerenstvo do održavanja sjednice (za informaciju):
 - Izvješće o zasjedanju parlamentarne konferencije WTO-a, održane u Ženevi 11. i 12.9.2008.godine (sačinilo izaslanstvo IPU grupe PSBiH pri IPU);
 - Izvješće o posjetu izaslanstva Povjerenstva za ostvarivanje ravnopravnosti spolova Zastupničkog doma Kraljevini Švedskoj od 23. do 25.9.2008.godine (sačinilo Povjerenstvo za ostvarivanje ravnopravnosti spolova ZD PSBiH);
 - Izvješće sa četvrtog dijela redovnog zasjedanja Parlamentarne skupštine Vijeća Europe u Strazburu, od 29.9. do 3.10.2008.godine (sačinilo izaslanstvo PSBiH u PSVE);
 - Izvješće o zvaničnom posjetu predsjednika Republike Slovenije, dr Danila Turka Bosni i Hercegovini 13. i 14.10.2008.godine (izvješće sačinilo Ministarstvo vanjskih poslova BiH);
 - Informacija o debati vođenoj na plenarnom zasjedanju Evropskog parlamenta povodom usvajanja rezolucija o BiH (izvješće sačinilo Ministarstvo vanjskih poslova BiH).
 - Izvješće sa sastanka Općeg komiteta za kulturu Parlamentarne skupštine Centralnoevropske inicijative, Beč, 25.-26. 9. 2008.
5. Tekuća pitanja.

Ad. 1. Usvajanje Zapisnika sa 33. sjednice Komisije;

Nije bilo rasprave i članovi Komisije su jednoglasno usvojili zapisnik sa 33. sjednice Komisije.

Ad. 2. Razmatranje inicijative zastupnika Branka Dokića s 36. sjednice Doma u vezi sa izlaganjem predsjedatelja Predsjedništva BiH Harisa Silajdžića prilikom obraćanja u Generalnoj skupštini UN-a i u Parlamentarnoj skupštini Vijeća Europe;

Slavko Matić je u vezi s ovom tečkom napomenuo da je jedna druga inicijativa koja se pojavila na istoj sjednici, inicijativa Remzije Kadrića, upućena na Ustavno-pravno povjerenstvo i zaključak tog povjerenstva u kom se pozivaju na Poslovnik i na pravo zastupnika da može pokretati inicijativu i samim tim da smatraju da takvu inicijativu treba prihvatiti i razmatrati na Zastupničkom domu.

Milorad Živković je kazao da bi na konstataciju Ustavno-pravne Komisije, koja bi mogla da bude model i kojem bi naša Komisija u skladu sa Poslovnikom nakon što preporuči Domu da se raspravlja o toj inicijativi, dodao zaključak da se zaduži Kolegij da u saradnji sa Predsjedništvom BiH zajednički dogovori kada će biti govora o toj tački dnevnog reda.

Azra Hadžiahmetović je kazala da bi tom zaključku dodala i odredbu o nadležnosti Komisije o kojoj je Milorad Živković ranije govorio.

Slavko Matić je predložio dva zaključka, prvi po kom bi Komisija u skladu sa Poslovnikom odnosno pravom zastupnika da pokreće inicijative, predložila Zastupničkom domu da raspravlja o ovoj temi, i drugi dio da se zatraži od Kolegija da u dogovoru sa Predsjedništvom BiH odredi termin kada bi Haris Silajdžić mogao biti prisutan, a po mogućnosti i drugi članovi Predsjedništva, u kom će se raspravljati o ovoj temi.

Husein Nanić je kazao da sa drugim dijelom zaključka mi ne prejudiciramo rješenje da će Dom prihvatiti raspravu i da misli da bi se trebali zadržati samo na prvom dijelu u kom se pozivamo na Poslovnik, a kako će se Dom odrediti i kojoj Komisiji će se dati zaduženje da bi trebao biti rezultat rasprave na Kolegiju da završi tu stvar. On je kazao da nije uobičajeno ni kod drugih zaključaka da mi tražimo da se obezbjedi neko i da se to podrazumjeva.

Slavko Matić je nakon toga predložio da drugi zaključak bude u formi preporuke Povjerenstva Kolegijumu da bi raspravi o toj tački trebali biti nazočni Branko Dokić kao inicijator i prije svega Haris Silajdžić o čijim govorima se radi.

Husein Nanić je kazao da ima drugačiji stav i da misli da ta tačka ne treba biti na dnevnom redu sjednice Predstavničkog doma.

Milica Marković je kazala da misli da ne bi trebalo da nijedan poslanik u Parlamentu ne da podršku kolegi poslaniku za bilo kakvu inicijativu da dođe na dnevni red. Inicijativa kad dođe na dnevni red onda će svi poslanici imati priliku da kažu svoj stav i mišljenje i definitivna je odluka Parlamenta da li će nešto iz te inicijative biti prihvaćeno ili odbijeno. Parlament je u prethodnom periodu prihvatao razne inicijative pa se o njima različito odlučivalo u konačnom ishodu u vezi rasprave o toj inicijativi. A kada je riječ o zaključku, kazala je da misli da bi trebalo podržati da se inicijativa Branka Dokića nađe na dnevnom

redu neke od narednih sjednica Predstavničkog doma, a kada dajemo pozitivno mišljenje o tome da je logičan slijed toga da se obezbjedi prisustvo i jedne i druge strane. Ona je kazala da Branko Dokić ima argumente zašto je postavio to pitanje i da Haris Silajdžić vjerovatno ima druge argumente u vezi sa tim i da ne vidi zašto je problem da Komisija da saglasnost da se o tome raspravlja na sjednici Predstavničkog doma, a Parlament će definitivno odlučiti o tome. Kazala je da nije kolegijalno i principijelno ne dati podršku bilo kom kolegi poslaniku da pokrene neku inicijativu.

Sefer Halilović je kazao da kako god Komisija odluči Predstavnički dom će donijeti konačnu odluku i da ne bi trebalo oko ovoga previše gubiti vremena.

Milorad Živković je predložio da se Komisija prvo izjasni o pozitivnom mišljenju u vezi inicijative Branka Dokića, a poslije u vezi nekog zaključka.

Slavko Matić je nakon toga stavio na glasanje zaključak da se inicijativa Branka Dokića nađe na dnevnom redu neke od narednih sjednica.

Članovi Komisije su sa šest glasova za i jednim uzdržanim dali pozitivno mišljenje u vezi sa takvim zaključkom.

U vezi sa drugim zaključkom Milorad Živković je kazao da će Kolegij svakako poslati poziv Predsjedništvu BiH tako da se Komisija nije izjašnjavala o zaključku da se preporuči Kolegiju da pozove članove Predsjedništva na sjednicu Predstavničkog doma.

Ad. 3. Upoznavanje članova Povjerenstva sa terminom posjeta Republici Hrvatskoj;

Slavko Matić je zamolio Merdžanu Iglicu da upozna članove Povjerenstva sa konačnom verzijom u vezi sa posjetom Republici Hrvatskoj.

Merdžana Iglica je kazala da je zvaničan datum posjete Hrvatskom saboru od 30.11. do 2.12. 2008. g. Ona je kazala da je u kontaktu sa tajnicom Komisije za vanjske poslove Hrvatskog sabora i da je ona već napravila nacrt posjete gdje je uvažila zahtjeve naše komisije za susret sa predstavnicima Sabora, Komisije za vanjske poslove i Komisije za Evropske integracije tako da je sadržaj posjete prilično popunjen. U vezi sa brojem članova Komisije koji će biti u delegaciji ona je kazala da je ranije bila praksa kad su u pitanju neposredni susjedi da se taj broj ne ograničava. Naglasila je da će program posjete čim bude poslan, biti dostavljen članovima Komisije.

Ad. 4. Upoznavanje sa izvješćima i informacijama pristiglim na Povjerenstvo do održavanja sjednice (za informaciju):

- **Izvješće o zvaničnom posjetu predsjednika Republike Slovenije, dr Danila Turka Bosni i Hercegovini 13. i 14.10.2008.godine (izvješće sačinilo Ministarstvo vanjskih poslova BiH);**

Rabija Mašić ispred Ministarstva vanjskih poslova BiH se ukratko osvrnula na posjetu predsjednika Slovenije, dr Danila Turka. Ona je kazala da je posjeta realizovana 13. i 14. 10. i da se predsjednik Slovenije u toku svog boravka u BiH susreo sa predsjedavajućim i članovima Predsjedništva BiH, sa predsjedavajućim Savjeta ministara BiH, sa predstavnicima Parlamentarne skupštine BiH, te da je posjetio Banja Luku, Mostar i

Srebrenicu. Ona je kazala da su zajednički zaključci tokom posjete da su ukupni bilateralni odnosi između BiH i Slovenije dobri i da postoji obostrani interes za njihovim stalnim unapređenjem. U tom pogledu istaknut je značaj intenziviranja kontakata na najvišem nivou.

Članovi Komisije primili k znanju informaciju o posjeti predsjednika Slovenije dr Danila Turka Bosni i Hercegovini.

Ad. 4. Upoznavanje sa izvješćima i informacijama pristiglim na Povjerenstvo do održavanja sjednice (za informaciju):

- **Informacija o debati vođenoj na plenarnom zasjedanju Evropskog parlamenta povodom usvajanja rezolucija o BiH (sačinilo Ministarstvo vanjskih poslova BiH), kao i Rezolucija Evropskog parlamenta od 23.10.2008. o zaključivanju SSP-a između Evropskih zajednica i njihovih država članica s jedne strane i BiH s druge strane.**

U vezi sa ovom tačkom Sadik Ahmetović je upoznao članove Komisije da je napisao pismo zahvale Jelku Kacinu, članu Evropskog parlamenta, u vezi s njegovom inicijativom za obilježavanje 11. jula kao međunarodnog dana sjećanja na Srebrenicu, i pozvao je članove Komisije da ga potpišu.

Azra Hadžiahmetović je na ovo predložila da se pismo ponudi na potpis svim poslanicima Predstavničkog doma na sutrašnjoj sjednici što je i prihvaćeno.

Ad. 4. Upoznavanje sa izvješćima i informacijama pristiglim na Povjerenstvo do održavanja sjednice (za informaciju):

- **Izvješće o zasjedanju parlamentarne konferencije WTO-a, održane u Ženevi 11. i 12.9.2008.godine (sačinilo izaslanstvo IPU grupe PSBiH pri IPU);**
- **Izvješće o posjetu izaslanstva Povjerenstva za ostvarivanje ravnopravnosti spolova Zastupničkog doma Kraljevini Švedskoj od 23. do 25.9.2008.godine (sačinilo Povjerenstvo za ostvarivanje ravnopravnosti spolova ZD PSBiH);**
- **Izvješće sa četvrtog dijela redovnog zasjedanja Parlamentarne skupštine Vijeća Europe u Strazburu, od 29.9. do 3.10.2008.godine (sačinilo izaslanstvo PSBiH u PSVE);**
- **Izvješće sa sastanka Općeg komiteta za kulturu Parlamentarne skupštine Centralnoevropske inicijative, Beč, 25.-26. 9. 2008.**

Članovi Komisije su primili k znanju pomenute informacije i izvješća.

Ad. 5. Tekuća pitanja;

Milica Marković je upoznala članove Komisije da je 30. i 31. 10. 2008. godine učestvovala na sjednici Interparlamentarne grupe za jugoistočnu Evropu gdje je bila na prijedlog ove Komisije predložena kao predstavnik Bosne i Hercegovine. Ona je informisala članove Komisije da su na tom zasjedanju utvrđena dva zaključka. Prvi da se interparlamentarna grupa koja se bavi saradnjom zemalja jugoistočne Evrope transformiše u Parlamentarnu

Skupštinu zemalja jugoistočne Evrope i takva inicijativa će biti predočena predsjednicima Parlamenata koji će se sastati na konferenciji u februaru naredne godine. A drugi je zaključak da će se pokrenuti inicijativa sa te konferencije predsjednika Parlamenata svih 11 zemalja iz jugoistočne Evrope prema Evropskoj uniji da se traži razmatranje ukidanja viznog režima za zemlje iz jugoistočne Evrope koje nisu članice Evropske unije, ili eventualno liberalizacija viznog režima. Drugi dan je bilo riječi o nacrtu principa po kojim će raditi Regionalni sekretarijat za parlamentarnu saradnju zemalja jugoistočne Evrope koji je zvanično smješten u Sofiji i uz tu priču je pohvaljena Bosna i Hercegovina kao zemlja domaćin koja je omogućila uslove i prostor za rad Savjeta za regionalnu saradnju u jugoistočnoj Evropi.

Merdžana Iglica je upoznala članove komisije da je 06.11. 2008.g. sjednica zajedničke Komisije za evropske integracije PSBiH na kojoj je jedina tačka dnevnog reda prezentacija redovnog godišnjeg izvještaja o napretku BiH u procesu evropskih integracija za 2008. godinu, a na kojoj će izvještaj prezentirati Dimitris Kurkulas, šef delegacije Evropske Komisije u BiH, i pozvala članove Komisije ako mogu da prisustvuju istoj.

Husein Nanić je zamolio sekretarijat Komisije da ubuduće sve materijale za Komisiju dobija putem e-mail-a.

Sjednica je završena u 11.45. sati.

Zapisnik sačinio:

Miroslav Stanišić, stručni saradnik u Komisiji za vanjske poslove

Sekretar Komisije

Merdžana Iglica

Predsjedavajući Komisije

Slavko Matić